

DÊPÄ TÎ PÖPÖKÖDÖRÖ TÎ NDIÄ TÎ BATA NENGÖ TERÊ TÎ ZO

TAKAPA

Na hîngängö bîanî atene nêngö terê tî zo na lîngbîngö terê tî ângangü tî lo laâ sî ayeke na gûndâ tî zarä , tî nzônî ngbanga na tî sîrîrî na ndö tî dûnîa,

Na hîngängö nî pëpëe na kêngö ândiä tî bata nêngö terê tî zo laâ adü kpälë tî birä sô abi ngonzo na bê tî âhalëzo, ngâ sî gängö tî mbênî finî ködörö sô âhalëzo kûe alîngbi tî tene tënë tî bê tî âla, tî mähê tî âla afa nî tîngana taâ kötâ békü tî âzo tî ndö tî gîgî,

Ayeke kötâ yê mîngi tî tene azî lê na ndö tî ândiä tî bata nêngö terê tî zo gî na lêngö mbênî gerê tî ndiä ndâlî tî sîönî sêgbîä na lêngö pâsi,

Na hîngängö nî atene ayeke kötâ yê mîngi tî mû ngangü na mäingö tî lêngö söngö na pöpö tî ködörö ndê ndê,

Na hîngängö nî atene na yâ tî sêndiä halëzo tî bendo tî gîgî afa tî finî nî mähê tî âla na âtaâ ndiä tî zo , na nêngö terê ngâ na kötâ tî zo na lîngbîngö terê tî ângangü tî kôlî na wâlî, sî âla atene ânî yeke sâra ngangü kûe tî mäingö tî sêduti tî zo na lêngö ânzônî lëgê tî dutî na yâ tî mbênî kötâ zarä ,

Na hîngängö nî atene âködörö sô abûngbi amû yângâ tî lê kpêngö ndiä tî bata nêngö terê tî zo na zarä tî lo na yâ tî kua tî mabôko na mabôko na bûngbi tî bendo tî gîgî,

Na hîngängö atene mângbîngö bê na ândiä sô na âzarä sô ngâ ayeke bîanî ngangü yê mîngi tî sâra kua sô gî na pekö tî yângâ sô âla mû,

Kötâ Lîngö

Avûnga

Dêpä tî pöpöködörö tî bätängö nêngö terê tî zo sô

tîngana kunibê sô halëzo na âködörö kûe alîngbi tî wara, sî âzo kûe ngâ na âkûndû tî bôso kûe asâra ngangü, na lëgê tî fängö mbëtî na fängö-ndo, tî lê kpêngö ândiä na âzarä sô ngâ tî sâra na kodê tî ândiä tî ködörö wala tî pöpöködörö tî tene ayêka nî ngâ sî alë tambûla nî na ndo kûe, na pöpö tî halëzo na letäa nî sô alü mbere nî, tîngana âla sô angbâ na gbe tî lê tî âla.

Sura 1

Adü âzo kûe yamba, ngâ âla lîngbi terê na lëgê tî nêngö-terê na tî ângangü. Ala kûe awara ndarä na bôrö-li sî âla lîngbi tî dutî na âmbâ tî âla gî na lêngö söngö.

Sura 2

Zo ôko ôko alîngbi tî pîka kate na ndö tî ângangü sô dêpä avûnga, na sârängö kângbi ôko pëpë wala na ndö tî tenê tî marä, wala tî nzorôko tî terê wala tî ndiä wala tî kôlî na wâlî tî yângâ ködörö wala tî mosoro, tî ndo tî düngö wala tî marä dutî,

Na ndônî kûe, alîngbi tî sâra mbênî kângbi ôko pëpë sô alöndö na ndö tî tënë tî porosö wala tî ndiä wala tî pöpöködörö, tî mbênî zo wala tî mbênî ködörö nî sô alîngbi tî dutî lipandä wala na gbe lê tî mbênî ködörö wala sô ayeke na kpälë tî sêgbîä.

Sura 3

Zo kûê ayeke na ngangü tî dutî na finî tî lo, tî dutî yamba na tî dutî na mbeto tî wara sïönî pëpëe.

Sura 4

Zo ôko alîngbi tî dutî na gbe tî ngbâa pëpëe. Akânga lêgë bîanî na dutî tî ngbâa ngâ na dëngö buzë tî kängö zo na ngbâa.

Sura 5

Zo ôko alîngbi tî sâra mbâ tî lo na pâsi tî ponön wala na pâsi tî finön pëpëe.

Sura 6

Zo kûê ayeke na ngangü tî tene ndiä abata lo na âsïönî lâkûê na ndo kûê.

Sura 7

Azo kûê alîngbi terê na lê tî ndiä, ngâ âla yeke na ngangü lêgë ôko na sârängö kângbi ôko pëpëe. Amû na âla ngangü na sêbätängö terê lêgë ôko, na tënë tî kângbi tî marä sô alîngbi tî fîngi dëpâ sô ngâ na tënë tî gîngö lêgë tî kângbi tî marä sô.

Sura 8

Zo kûê alîngbi tî lî ngbanga na âdangbanga tî ködörö tî lo tïngana âzo akpë pëpëe ângangü sô sëndiä tî ködörö tî lo amû na lo.

Sura 9

Alîngbi ôko pëpëe tî gbû zo na kânga wala tî bata lo na kânga wala tî tokua zo yongôro na ködörö tî lo gî sêngê sêngê, tïngana ndâ nî ayeke da pëpëe.

Sura 10

Zo kûê ayeke na ngangü, lêgë ôko na âmbâ tî lo, tî tene amä polêlê tënë tî yângâ tî lo na lê tî boro ngbanga sô fadê afa ânde wala ângangü wala âkuandiä tî lo wala tïngana pängö îrî na tënë sô alî ngbanga da na ndö tî lo sô ayeke mbîrîmbîrî.

Sura 11

Zo kûê sô apâ îrî tî lo na ndö tî mbênî kpälê angbâ mokondö asî na ngôi sô afa na lêgë tî ndiä atene lo sâra sïönî, na lê tî mbênî ngbanga tî polêlê sô âwakokö kûê adu da na pekö tî lo.

Alîngbi pëpëe tî kânga zo ndâli tî âyê sô lo sâra wala tî bégirisa sô, na ngôi sô asî sô, ndiä tî ködörö wala ndiä tî pöpöködörö afa nî tïngana kpälê pëpëe. Lêgë ôko, alîngbi tî dîko pëpëe mbênî ponön sô akono ahön ndö tî lo sô ayeke dë ka nî na ngôi sô zo asâra kpälê sô.

Sura 12

Alîngbi ôko pëpëe tî yôro terê na mbänä na yâ tî sêduti tî zo wala tî sêwa tî lo wala tî da tî lo wala tî dîko mbëtisû tî lo. Alîngbi pëpëe tî buba îrî tî zo ngâ na wüngö tî îrî tî lo. Zo kûê ayeke na ngangü tî tene ndiä abata lo ngbanga tî âmarä kpälê tïngasö.

Sura 13

Zo kûe ayeke na ngangü tî fonon yamba na yâ tî ködörösêse kûe. Lo yeke ngâ na ngangü tî soro ndo tî dutî tî lo na yâ tî mbênî ködörösêse.

Zo kûe ayeke na ngangü tî sigî na yâ tî ködörösêse kûe atâ adu ködörösêse tî lo, ngâ tî kîri na ködörösêse tî tîngana sô bê tî lo ayê.

Sura 14

Na yâ tî ponön tî hongando, amû légë na zo kûe tî gi ndo tî dutî da ngâ lo lingbi tî wara nî na ködörösêse tî lo.

Alingbi pepëe tî mû ngangü sô na wakpälë tî fängö zo wala na zo tî särängö ayê sô ague pepëe na légë tî âpo na âkunibê tî bungbi tî bendo tî gîgî.

Sura 15

Amû ngangü na zo kûe tî tene lo du zo tî mbênî ködörösêse.

Alingbi pepëe tî gbânzi mbêni zo na mbänä tî du waködörösêse ngâ na ngangü tî gbân ködörösêse tî lo.

Sura 16

Asî na ngô sô âla lingbi tî mû terê, amû ngangü na kôli na wâlî tî mû terê tîngana kôli na wâlî, sî âla lê sewä sêngê, tënë tî marä wala tî ködörösêse wala tî mabê alingbi tî kanga légë nî pepëe. Na mbâgë tî müngö terê, amû ngangü, légë ôko na kôli na wâlî na yâ tî dutîngö tî âla ngâ na kangbingö tî âla.

Kôli na wâlî alingbi tî mû terê gi tîngana bê tî âla use kûe ayê tënë nî bîanî.

Sewä ayeke na gündâ tî halëzo. Ni laâ, amû ngangü na letäa ngâ na âzo kûe tî tene âla bata nî ngangü.

Sura 17

Zo kûe wala lo dutî na bôsôngbi wala lo dutî lo ôko ayeke na ngangü tî wara âkûngbâ tî lo mvenî.

Alingbi pepëe tî mû âkûngbâ tî mbênî zo na ngangü na maboko tî lo.

Sura 18

Amû na zo kûe zarä tî bibê, tî boro-li na tî mabê ; ngangü sô afa atene zo kûe ayeke na zarä tî gbân mabê tî lo, wala bibê tî lo ngâ na zarä tî fa polêlê mabê tî lo, lo ôko wala na yâ tî mbênî bungbi, polêlê wala koiko, na légë tî fängö mbëtî, tî särängö yê, tî vöröngö nzapâ ngâ na särängö ângôbo.

Sura 19

Amû na zo kûe ngangü tî zarä tî bibê na tî särängö tënë. Sô atene alingbi tî doroko zo pepëe ndâli tî âbibê tî lo. Amû ngâ na zo kûe ngangü tî gi, tî wara na tî vûnga âsango na âkodê na âmarä légë kûe, na zïängö bê pepëe na ndö tî tënë tî âmekâ.

Sura 20

Amû na zo kûe ngangü tî zarä tî gbê lingö, tî lî na yâ tî bôsôngbi tî sîrîrî.

Alîngbi pëpëe tî gbû zo na ngangü tî lî na yâ tî mbênî bôsôngbi.

Sura 21

Amû na zo kûê ngangü tî sâra kua tî lêngö ködörö tî lo, wala lo mvenî wala na lègë tî âwasêlê sô asoro âla yamba.

Amû na zo kûê ngangü tî wara kua na yâ tî ndokua tî letäa, lègë ôko na âmbâ tî lo.

Kunibê tî halëzo ayeke na gündâ tî ngangü tî awalêngö ködörö. Kunibê sô alîngbi tî fa gî na lègë tî aboro soro sô ayeke bâa gîgî ngô na ngô, na lègë tî gbegô mobimba ngâ na köbö soro wala na mbênî ngôbo sô amû ngangü tî zarä tî soro.

Sura 22

Zo kûê tîngana wabôso tî halëzo ayeke na ngangü na kodëkua tî bätängö terê. Alöndö na âbängö nzönî na pekô tî ângangü tî mosoro, tî zängbingörö terê, tî ndara sô ayeke kötâ yê ndâlî tî nëngö terê na boro mäingö tî sêterê tî lo; gî na lègë tî gbüngö mbîrîmbîrî kua tî ködörö ngâ na tî tängbingö kua na âködörö wandë sô abäa dôngôngbi na môsôrö tî ködörö ôko ôko.

Sura 23

Amû na zo kûê ngangü tî sâra kua, na zarä tî söröngö kua tî bê tî lo, na yâ tî boro ngâ na nzönî gerê tî kua. Alîngbi ngâ tî bata zo ngbanga tî tënë tî ponön tî sârängö kua pëpëe.

Zo kûê alîngbi tî wara boro nginza tî kua sô alîngbi na kua sô lo sâra

Zo sô asâra kua alîngbi tî wara boro nginza tî kua sô alîngbi tî tene lo na âsëwä tî lo adutî na yâ tî nëngö terê. Na ndönî kûê, amû na lo anzîna ngangü tî sêbätängö terê.

Zo kûê awara ngangü tî kî na âmbâ tî lo âbûngbi tî âwakua, ngâ tî lî bûngbi na âmbênî âbûngbi tî âwakua ngbanga tî gbüngö kokö tî âla.

Sura 24

Amû na zo kûê ngangü tî woterê tî lo, tî sâra ngîa ngâ. Sô atene alîngbi tî dë gî na lègë nî lăngö kâpâ tî kua ngâ na âlăngö tî wöngö terê sô afûta nî.

Sura 25

Zo kûê alîngbi tî wara nginza sô alîngbi na lo sî lo lë sênî tî lo, nzönî dutî tî lo ngâ na tî sewä tî lo bianî na lègë tî têngö kôbe, yüngö bongö, mûngö yoro ngâ na zängbingö terê. Amû na lo ngangü tî bâa nzönî na lègë tî zängbingö terê na ngô sô lo du na kua pëpëe, wala na ngô tî söngö terê wala ngbanga tî zën, wala ngbanga tî ndü, tî kangba wala na yâ tî âmbênî ngô sô zo nî ayeke na mbênî lègë tî bätängö na finî tî lo pëpëe, na pekô tî âmbênî sîökpälê sô asî na lo.

Awâlî tî ngo na âmolengê tî âla alîngbi tî wara taâ nzönî na kua tî zängbingö ndo. Amôlengê kûê, wala adü âla na yâ tî mûngö terê wala adü âla da pëpëe ayeke na ngangü na nî lègë ôko.

Sura 26

Amû na zo kûê ngangü tî mändängö mbetî. Ayeke fûta mändängö mbetî nî pëpëe, mbîrîmbîrî na âkêtê dambetî. Mändängö kodëyê na kodëkua alîngbi tî gbû ndo kûe.

Zo kûê alîngbi tî manda mbëtî na kôtä dambëtî, gî na lêgê tî kodê tî lo na hîngängö ndo tî lo.

Fängö mbëtî alîngbi tî gue na lêgê tî kono sêterê tî âzo ngâ tî kono ndiä tî bätängö nëngö terê tî âzo . Lo lingbi ngâ tî mû lêgê tî kpêngba mängö terê, vürüngö bê na sôngö na pöpö tî âködörösêse tî âmarä wala âmabê ndê ndê ngâ na mäïngö âkua tî bûngbi tî bendo tî gîgî ngbanga tî bata sîrîrî.

Awadüngö môlengê âmvenî alîngbi tî soro yamba kodê lêgé tî fängö hîngägö ndo na âmôlengê tî âla.

Sura 27

Zo kûê ayeke na ngangü tî lë kua tî sêndägao tî âsöngö tî lo, tî tene lo wara âpendere yê tî ködörö tî lo na lo zîa maboko na mäïngö tî âsêndâyê ngâ na lo bâa nzônî na pekô nî.

Amû na zo ôko ôko ngangü tî sêbätängö ânzônî yê tî lo sô alîngbi tî dutî âkûngbâ wala âbibê ti lo-mvenî. Anzônî yê sô alîngbi tî löndö na pekô tî âkodëkua, asêndâyê, âsêndâsû wala tî sêndägao sô lo mvenî lo sâra.

Sura 28

Tî tene âzo akpê ângangü sô afa ge sô, ayeke nzônî mbênî dôngôngbi adu da sô alîngbi tî bata nî. Dôngôngbi sô alîngbi tî dutî na yâ tî ködörö nî tòngana na yâ tî dünîa mobimba.

Sura 29

Zo ayeke na âhonga na mbâgê tî bôso sô lo du da sî lo mâi da yamba . Nî laâ sî alîngbi tî mû na lo lêgê tî tene sêterê tî lo amâi nzônî bîanî.

Ndiä alîngbi tî lë ângangü tî bätängö nëngö terê tî zo . Lo lingbi ngâ tî mû lêgê na zo ôko ôko tî kpê âmbâ tî lo ngâ tî tene âmbâ tî lo akpê lo.

ângangü sô na âzarä sô alîngbi ôko pëpë tî fîngi âwêsêlô, âpö, na gbegôndiä tî bûngbi tî bendo tî gîgî mobimba.

Sura 30

Mbênî ködörösêse ôko pëpëe wala mbênî zo tî gîgî ôko alîngbi pëpëe tî buba lêgê tî ândiä sô afa ge na yâ tî mbëtî-dêpä sô.